

МЕСЯЦА НОЕМВРИА В 16-Й ДЕНЬ.
СВЯТАГО АПОСТОЛА И ЕВАНГЕЛИСТА МАТФЕЯ
НА ВЕЧЕРНИ

Блажен муж: 1-й антифон.

На Господи, воззвах: стихиры на 8, глас 4.

Подобен: Званный свыше:

Испытай сердца человеков, * егда твой Божественный разум, апостоле, * Божественным проведением узре, * от неправды и от мира тя избави; * тогда ты всемирный Свет содея, * вселенныя концы просвещати и облистати повелев, * Егоже и Божественное Евангелие сподобился еси яже написати. * Того моли спасти и просветити души наша.

Иже от мытарства призван на ученичество, * егда ты Безначальное Слово возгласи, * последовати повелев и обещание Царствия обещав, * тогда, всеблаженне, вся оставив * и смущения мятежного отпел, * Тому крепко последовал еси * и ныне, Боговидче, насыщаемь * неизреченного Его видения ясно. * Егоже моли спасти и просветити души наша.

Пророческое некое яже острозрение * древле ты, святого камня, узре, * на земли валяющаяся * и прелестная сокрушающая ухищрения. * Слово же, всеумудре, Ипостасное, * свет ты мира и проповедника правды и истины соверши, * уяснена лучами Трисолнечного Света, всечестне, * Егоже моли спасти и просветити души наша.

Пребожественныя мудрости слуго, * егда неприступный Свет прииде плотию, * якоже изволи, * неведения разоряя омрачения, * тогда, призываемь, последовал еси жизноносным повелением * и хранитель Божественный быв паче смысла, * церковный быв светильник, * Матфее, Христово обителище. * Егоже моли спасти и просветити души наша.

Языком огненным прелесть попяля, * явился еси, всехвальне, Матфее премудре, * Утешителево приемь пришествие, * существом тебе освещающая, * отсюда удивил еси всяко помышление слышащих словес твоих, * к людем глаголав величества Вседержителя, * и ныне во всю землю изыде твое вещание, Богодохновенне. * Егоже моли вся ущедрити поющия ты.

Слава, глас 4. Самогласен:

Зовущу Христу ко ученичеству Небесному * усердно последовал еси, Богоприятне, * все упражнение попечения земного одиночи отринув, * достойный бо Горняго Царствия * разум благопокорне восприим, * долеревностнаго жительство и славы твоя отступил еси, * благовестник от мытаря быв, * свет же во тьме сущим явился еси * и заблуждашим путевождь ко спасению; * ныне же молитвенник всего мира теплейший * и тебе чтущих, Матфее, хранитель спасительный.

И ныне, Богородичен: Иже Тебе ради:

Вход. Прокимен дне и чтения 3.

Соборнаго послания Петрова чтение (зачало 58):

Петр, апостол Иисус Христов, избранным пришельцем разсеяния, Понта, Галатии, Кападокии, Азии и Вифинии, по прозрению Бога Отца во святыню Духа,

в послушание и кропление Крове Иисус Христовы, благодать вам и мир да умножится. Благословен Бог и Отец Господа нашего Иисус Христа, Иже по мнозей Своей милости порождает нас во упование живо воскресением Иисус Христовым от мертвых, в наследие нетленно, и нескверно, и неувядаемо, соблюдено на Небесех вас ради, иже силою Божиею соблюдени верою во спасение готовое явится во время последнее. О немже радуйтесь, мало ныне, аще лепо есть, прискорбни бывше в различных напастех, да искушение ваша веры многочиснейше злата гибнуца, огнем же искушена, обрящется в похвалу, и честь, и славу во откровение Иисус Христове. Егоже не видевши, любите, и на Негоже ныне не зряще, верующе же, радуетесь радостию неизглаголанною и прославленною, приемлюще кончину вере вашей спасение душам. О Немже спасении зыскаша и испыташа пророцы, иже о вашей благодати прорекоша, испытующе, в какво или в кое время являше в них Дух Христов, прежде свидетельствуя о Христовех страстех и яже по сих славах, имже открыся, яко не им самем, но нам служаху сия, яже ныне возвестишася вам, благовествовавшими вам Духом Святым, посланным с Небесе, в няже желают Ангели приинкнути. Темже, возлюбленнии, препоясавше чресла помышления вашего, трезвящися, совершенно уповайте на приносимую вам благодать откровением Иисус Христовым. Яко чада послушания, не преобразующесе первыми неведения вашего похотении, но по звавшему вы Святому и сами святы во всем житии будите. Зане писано есть: святы будите, яко Аз Свят есмь. И аще Отца называете, нелицемерно судяща комуждо по делу, со страхом жития вашего время жительствуйте, ведяще, яко не истленным серебром или золотом избавистесь от суетнаго вашего жития, отцы преданнаго, но честною Кровию яко Агнца Непорочна и Пречиста Христа, предуведена убо прежде сложения мира, явльшася же в последняя лета вас ради. Иже Его ради веруете в Бога, воздвигшаго Его из мертвых и славу Ему давши, яко да вера ваша и упование будет на Бога. Души ваша очистивше в послушание истины духом, в братолюбие нелицемерно, от чиста сердца друг друга любите прилежно, порождени не от семени истленна, но неистленна, словом Живаго Бога и пребывающа во веки. Зане всяка плоть, яко трава, и всяка слава чловеча, яко цвет травный. Изсше трава, и цвет ея отпаде, глагол же Господень пребывает во веки, се же есть глагол благовестованный в вас. Отложше убо всяку злобу, и всяку лесть, и лицемерие, и зависть, и вся клеветы, яко новорождени младенцы, словесное и нелестное млеко возлюбите, яко да о нем возрастете во спасение. Понеже вкусисте, яко благ Господь. К Немуже приходяще, Камению Живу, от человек убо уничижену, от Бога же избранну, честну, и сами, яко камение живо, зиждитесь в храм духовен, святительство свято возносити жертвы духовны, благоприятны Богови Иисус Христом. Зане писано есть в Писании: се полагаю в Сионе Камень Краеуголен, избран, честен, и веруй в Онъ не постыдится.

Соборнаго послания Петрова чтение (зачало 59):

Возлюбленнии, Христос пострада по нас, нам оставль образ, да последуем стопам Его. Иже греха не сотвори, ни обретесе лесть во устех Его, Иже укаряемъ, противу не укаряше, стражда, не прецаше, предающе же судящему праведно. Иже грехи наша сам вознесе на теле Своем на Древо, да, от грех избывше, правдою поживем, Егоже язвою исцелесте. Бесте бо, яко овцы заблуждшия, не имуще пастыря, но возвратитесь ныне к Пастырю и Посетителю душ ваших. Такожде же и жены, повинующесе своим мужем, да и аще нецыи не повинуются слову, женским

житием без слова пленени будут? видевши еже со страхом чисто житие ваше. Имже да есть не внешняя плетения влас, и обложения злата, или одеяния риз лепота, но потаеный сердца человек в неистлении кроткаго и молчаливаго духа, еже есть пред Богом многоценно. Тако бо иногда и святыя жены, уповающия на Бога, украшаху себе, повинующеся своим мужем: якоже Сарра послушаше Авраама, господина того зовущи, еяже бысте чада, благотворяще и не боящися ни единого страха. Мужие, такожде вкупе живуще с своими женами по разуму, яко немощнейшу сосуду, женскому воздающе честь, яко и снаследницы благодатныя жизни, во еже не прекращатися молитвам вашим. Конец же – вси единомудрени будите, милостиви, братолюбцы, милосердни, благоутробни, мудролюбцы, смиреномудри, не воздающе зла за зло или досаждения за досаждение, супротивное же благословяще, ведяще, яко на се звани бысте, да благословение наследите.

Соборнаго послания Петрова чтение (зачало 61):

Возлюбленнии, Христу пострадавшу за ны плотию, и вы в ту же мысль вооружитесь, зане пострадавый плотию преста от греха. Во еже не ктому в человеческия похоти, но в волю Божию прочее во плоти жити время. Довлеет бо вам мимошедшее время жития, волю языческую творившим, хождшим в нечистотах, в похотех, в скотоложстве, в помыслех, в пьянстве, в козлогласованиях, в лихоимании и богомерзских идолослужениях. О немже дивятся, не сходящимся вам в то же блуда разливание, хуляще, иже воздадут слово готову Сущему судити живым и мертвым. На се бо и мертвым благовестися, да Суд убо примут по человеку плотию, поживут же по Бозе Духом. Всем же кончина приближися, уцеломудритесь убо и трезвитесь в молитвах. Прежде же всех друг ко другу любовь прилежну имейте, зане любовь покрывает множество грехов. Страннолюбцы друг ко другу без роптаний. Кийждо, якоже прият дарование, между себе сим служаще, яко добрии строителие различныя благодати Божия. Аще кто глаголет яко словеса Божия, аще кто служит яко от крепости, юже подает Бог, да о всем славится Бог Иисус Христом, Емуже есть слава и держава во веки веков, аминь.

Аще изволит настоятель пети литию, зри сего месяца в 14 день.

На стиховне стихиры, глас 4.

Подобен: Дал еси знамение:

Словес твоих трубою человеки собрал еси * в Божие познание, приснопеваеме, * и прелестная собрания от земли отгнав, * во едино верныя единомыслие управил еси * и молишися ныне от тли и бед избавитися * верою совершающим присно честную память твою.

Стих: Во всю землю изыде вещание их * и в концы вселенныя глаголы их.

Иже языком тя вооружив огненным Духа Святаго, * крепка показа тя борца на прелесть, апостоле, * Христос Бог наш, * Имже приял еси светлыя почести благодати. * Егоже моли от тли и бед избавитися * верою совершающим присно честную память твою.

Стих: Небеса поведают славу Божию, * творение же руку Его возвещает твердь.

Во глубины Духа приник, апостоле, * неистоцимое богатство поразумел еси * и, из Него почерп благодать обильную, * нам Евангельски всем сию раздал еси, * и

молишися ныне от тли и бед избавитися * верою совершающим присно честную память твою.

Слава, глас 6:

Из глубины злобы последняя * к zelo крайнейшей высоте добродетели, * яко орел высокопарный, преславно востекл еси, * Матфее всехвальне, * покрывшаго бо Небеса добродетелию * и разума Своего всю землю исполнившаго, Христа * последовал еси стопам: * подражатель, разжжен во всем Тому, явился еси, * благовествуя мир, жизнь и спасение * повинующимся благочестне Божественным повелением: * в няже и нас настави, благоугождающия Зиждителю * и тебе ублажающия.

И ныне, Богородичен: Творец и Избавитель мой:

Тропарь, глас 3:

Усердно от мытницы к звавшему Владыце Христу, * явьшуся на земли человеком за благодать, * Тому последовав, апостол избранный явился еси * и благовестник Евангелия вселенней велегласен. * Сего ради чтим честную память твою, Матфее Богоглаголиве, * моли милостиваго Бога * да грехов оставление подаст душам нашим.

Слава, и ныне, Богородичен:

Тя, ходатайствовавшую спасение рода нашего, * воспевает, Богородице Дево: * плотию бо от Тебе восприятоу Сын Твой, и Бог наш, * Крестом восприим страсть, * избави нас от тли, яко Человеколюбец.

НА УТРЕНИ

На Бог Господь: тропарь, глас 3:

Усердно от мытницы к звавшему Владыце Христу, * явльшуся на земли человеком за благодать, * Тому последовав, апостол избранный явился еси * и благовестник Евангелия вселенней велегласен. * Сего ради чтим честную память твою, Матфее Богоглаголиве, * моли милостиваго Бога * да грехов оставление подаст душам нашим. [Дважды]

Слава, и ныне, Богородичен:

Тя, ходатайствовавшую спасение рода нашего, * воспевает, Богородице Дево: * плотию бо от Тебе восприятоу Сын Твой, и Бог наш, * Крестом восприим страсть, * избави нас от тли, яко Человеколюбец.

По 1-й кафизме седален, глас 1.

Подобен: Гроб Твой, Спасе:

Первый Христово Евангелие написав * и всю просветив подсолнечную тварь, * Матфеем, зело премудрейший * и Христов таинник изящный, * ныне почитаемъ священными песньми, * всем отпущения грехов просит любовию чтущим того.

Слава, и ныне, Богородичен:

Матерь Тя Божию вемы вси, * Деву воистинну и по рождестве явльшуюся, * любовию прибегающей к Твоей благодати: * Тя бо имамы, грешнии, Предстательницу, * Тя стяжахом в напастех спасение, * едину Всенепорочную.

По 2-й кафизме седален, глас 3.

Подобен: Божественныя веры:

Делы просияв правоверия, * все угасил еси злославие, * победитель быв неборен, * Евангелие всем проповедал еси, * Церкви вся богато украсил еси, Матфее апостоле, * Христу Богу молися * даровати нам велию милость.

Слава, и ныне, Богородичен:

Божественнаго естества не отлучся, * плоть быв во чреве Твоем, * но Бог вочеловечся и пребысть, * Иже по рождестве Матерь Тя Деву, * яко прежде рождества, сохранив всенепорочну, един Господь, * Того прилежно моли * даровати нам велию милость.

По полиелеи седален, глас 8.

Подобен: Премудрости и Слова:

Во вся концы протече мудрых твоих глагол * яко воистинну вещание, всехвальне Господень апостоле, * Боговидение всем ясно проповеда * и язык неразумие в разум приведе. * Тем идольское омрачение отгнав, * свет разума во тьме сущим возсия, * Матфее всехвальне, моли Христа Бога грехов оставление даровати * чтущим любовию святую память твою.

Слава, и ныне, Богородичен:

Яко Деву и едину в женах, Тя, без семени рождающую Бога плотию, * вси ублажаем роди человечести: * огонь бо вселися в Тя Божества, * и яко Младенца млеко питаеши Зиждителя и Господа. * Тем Ангельский и человеческий род достойно славим пресвятое Рождество Твое * и согласно вопием Ти: * моли Христа Бога

согрешений оставление даровати * поклоняющимся верою пресвятому Рождеству Твоему.

Степенна, 1-й антифон 4-го гласа.

Прокимен, глас 4: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Иоанна: зачало 67.

Во время оно, явися Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясахся сам, и хождаше, аможе хотяше, егда же состареешися и воздежеш руце твои, и ин тя пояшет, и ведет, аможе не хоцеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хощу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хощу тому пребывать, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мноу всему миру вместити пишемых книг. Аминь.

По 50-м псалме стихира, глас 6:

Восплещем в песнях днесь, вернии, * в памяти честнаго апостола и Евангелиста Матфея, * той бо, поверг иго и злато мытарства, последова Христу * и проповедник Евангелия Божественнаго бысть: * отнюдуже изыде пророчески вещание его во вселенную * и молит спастися душам нашим.

Канон Богородицы со ирмосом на 6 и апостола на 8. Феофаново. Глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуяся, Тоя чудеса.

Богатно подаждь ми всельшуюся в тя благодать, Матфее всеславне и слуго Христов, да вопию, светло проповедаю, и воспою, радуяся, твоя чудеса.

Весьма оставил еси земных смущение, Слова бо яко услышав воплощшагося глас, и благодати явился еси строитель и проповедатель Богоприятен, Богоблаженне.

Самовидец быв и слуга возсиявшаго Слова, апостоле, Превечнаго Отца, и протека еси, Того пришествие благовествуя всем языком.

Богородичен: Смерти потребление и тли разрушение, Жизни же явление благовестил еси, мудре, Дева бо во утробе заченши Непостижного и мир обнови.

Катавасия: Отверзу уста моя:

Песнь 3

Ирмос: Твоя песнословцы, Богородице, * живый и независтный источниче, * лик себе совокупльшия, духовно утверди, * в Божественной Твоей славе * венцев славы сподоби.

Твоя апостолы, Слово Божий, светильники показал еси жизни, мрак отгоняющия безбожия, Владыко, и Божественною Твоею славою мир весь просвещающия.

Твоим вооружив всеоружием Матфея храбрейшаго, Спасе, мучителей крепчайша сего содеял еси, Владыко, и потребителя показал еси идольския лести, Человеколюбче.

Языка твоего огненнаго вещание демонская пожже капища, Матфее Богодохновенне, Параклитов органе, чрез Егоже Христос проповедается, всех Жизнь Ипостасная.

Богородичен: Труба Богословная, вещающая крепко, просвети люди, Матфея Богомудраго, Троицы сияние, паче ума же воплощение Слова из Тебе, Пречистая.

Седален, глас 8.

Подобен: Премудрости:

Во вся концы протече мудрых твоих глагол яко воистинну вещание, * всехвальне Господень апостоле, * Боговидение всем ясно проповедал еси * и языков неразумие в разум привел еси. * Темже, идольское омрачение отгнав, * свет знания во тьме сущим возсиял еси, * Матфее всехвальне, * моли Христа Бога грехов оставление даровати * чтущим любовию святую память твою.

Слава, подобен тойже:

Яко светильника Света и ученика, * яко самовидца Слова Божественнаго вси хвалим тя, Господень апостоле, * ибо, благодатныя твоя мрежи простирая, * словесныя рыбы уловляеши повелением. * Темже и языцы уловляхуся силою Духа, * наставляеми верою, неботаинниче всехвальне, * моли Христа Бога грехов оставление даровати * чтущим любовию святую память твою.

И ныне, Богородичен:

Яко Всенепорочная Невесто Творца, * яко Неискусомужная Мати Избавителя, * приятелище яко сущи Утешителя, Препетая, * беззаконию мя суща скверное обителище * и демоном игралице в разуме бывша, * потщися от тех злодейства мя избавити * и светлое жилище добродетелей соверши, Светоносная, Нетленная, * отжени облак страстей, и Вышняго причастия сподоби, * и света невечерняго молитвами Твоими.

Песнь 4

Ирмос: Незиследный Божий совет, * еже от Девы воплощения * Тебе, Вышняго, * пророк Аввакум, усмотряя, зовяше: * слава силе Твоей, Господи.

Ипостасному Твоему Слову, Боже, научен, мирскую мудрость разруши Боговидец ученик, велегласно зовя Тебе: слава силе Твоей, Господи.

Ублаженному от Христа, кое благохваление принесем тебе, Богоглаголиве? не может бо человек цветящая на тебе благодати словом изрещи, досточудне.

Нескверный твой и чистый ум видеВ Высочайший, якоже свещу на свещник высокий, сущим во тьме светящую, всем, Богоявленне, предложи.

Богородичен: Умерщвленное естество человеческое, Благословенная, возвысила еси, яко Высочайшаго рождающая крепость паче естества, всепетая Отроковице, якоже Матфей научи.

Песнь 5

Ирмос: Ужасошася всяческая * о Божественной славе Твоей: * Ты бо, Неискусобращная Дево, * имела еси во утробе над всеми Бога * и родила еси безлетнаго Сына, * всем воспевающим Тя * мир подавающая.

Благодать прием Всесвятаго Духа, Божественное обителище показался еси; Божественно научив Богознания свету, вверен был догматы Христовы писмены изложить, яко самовидец Богоизбранный.

Язык твой трость Параклита бысть, скорое избавление дающего познавшим владычество Его и мудрых вдышущаго душам разум Небесный, о Матфее всечестне.

Сияющая чудесы и исцелений благодатьми, ты Христос посла миру, демонскую попирающая крепость и души просвещающая верных, всех поющих ты, мира проповедника.

Богородичен: Дева родила еси Сына Превечнаго, в естество облекшася человеческое, якоже научая, Богоглаголивый рече, и спасающего сие от тли конечною благодатью, и Дева пребыла еси.

Песнь 6

Ирмос: Приидох во глубины морския, * и потопила мя есть буря многих грехов, * но, яко Бог, из глубины возведи живот мой, * Многомилостиве.

Евангелист от мытарства яко последова Тебе, претворися Богоглаголивый всеильною Твоею, Вседетелю, крепостию, Матфей всеизряднейший.

Управляется твоего благовестия душепитательными словесы языков множество, возвышаемо к добродетелей высокому верху, о Матфее всеблаженне.

Матфея уловляются Богоплетенными ученика мрежами соборы верующих всегда, к Твоему познанию, Благодетелю, наставляеми.

Богородичен: Деву рождающую восписую, благовествует Тя, всяческая Сотворшаго, без семени и тли, Всенепорочная, Матфей всеизряднейший.

Кондак, глас 4.

Подобен: Вознесыйся:

Мытарства иго отверг, * правды игу притяглася еси * и явился еси купец всеизряднейший, * богатство принес юже с высоты премудрость. * Отонудуже проповедал еси истины слово * и унылых воздвигл еси души, * написав час судный.

Икос: Вражие мучительство нудит мя несытно и души моя все семя восхищает, Матфее, друже Христов. Но сам, семя молитв твоих дав, уплуди к твоему служению и покажи мя песнопевца твоего малейшаго и сказателя многих твоих и великих исправлений; и ко Христове любви како, вся абие оставив, последовал еси тепле Звавшему, первый быв блавестник в мире, написав час судный.

Песнь 7

Ирмос: Не послужиша твари Богомудрии * паче Создавшаго, * но огненное прещение мужески поправше, * радовахуся, поюще: * препетый отцев Господь и Бог, благословен еси.

Был еси перваго осияния Божественное изображение, яко ученик Того светлостьми распаляемь, Емуже, поя, глагола еси: препетый отцев Господь и Бог, благословен еси.

Яко слуга Слова, всеблаженне, в Божественныя обители, идеже Христос обитает, ты вселился еси, якоже тебе обеща Пребожественный отцев Господь и Бог един всех.

Недузи, Матфее, отгонятся, и отбегает множество демонов сущими в тебе дарованьми Божественнаго Духа, в нихже пел еси: препетый отцев Господь и Бог, благословен еси.

Богородичен: Всепетую Деву написал еси Божественными твоими словесы, Творца всех рождшую, апостоле, Емуже вси поем: препетый отцев Господь и Бог, благословен еси.

Песнь 8

Ирмос: Отроки благочестивыя в печи * Рождество Богородичо спасло есть, * тогда убо образуемое, * ныне же действуемое, * вселенную всю воздвизает пети Тебе: * Господа пойте дела * и превозносите Его во вся веки.

Мановеньми, яже в Тебе неослабными, Матфей священнейший обожаемь, положением же быв, естеством еже был еси, вселенную, Владыко, привлече пети Тебе: Господа пойте дела и превозносите во вся веки.

Якоже молнию вселенней, Слово Богослова посла, мрак убо отгоняюща, языки же просвещающа Богословия догматы. Темже и пояше: Господа пойте дела и превозносите Его во вся веки.

Словом чистым и умом Бог с тобою беседовал есть, тину бо яко изсекл еси, Тому приблизился еси и примесился еси, славне. Темже и поеши: Господа пойте дела и превозносите Его во вся веки.

Богородичен: На благодаяние человеков Слово воплотится изволи: дверь бо девства пройде Господь и Богородицу показа. Темже зовем: Господа пойте дела и превозносите Его во вся веки.

Песнь 9

Ирмос: Всяк земнородный * да възыграется, Духом просвещаемь, * да торжествует же Безплотных умов естество, * почитающее священное торжество Богоматере, * и да вопиет: * радуйся, всеблаженная * Богородице, чистая Приснодево.

Доброты умныя приял еси диадиму Божественную, апостоле, и Царствия же благолепнейшим венцем украсился еси десницею Вседержителевою, и светишися, мудре, со Ангелы Престолу предстоя Владыки Христа, всеблаженне.

Древа жизни достойно получил еси, проповедник Живаго Бога, благовествовав жизнь миру Божественное посещение: садом бо знания не растлил еси ум, пребыв незыблен и неколеблен Церкви степень, всеблаженне.

Невесту Христову Божественно украсил еси Евангелием твоим, яко диадимую, Церковь, Богоблаженне, и ныне Божественную твою память торжествует светло, юже избавити всякаго обстояния и бед лютых моли, Матфее апостоле.

Богородичен: Недр не отступив Безначальнаго Родителя, Слово Безначальное, якоже благовествует Матфей, пища, Бог воплотися из Тебе, Чистая, Всепетая, в человек образ всеобразно весь одеявся и того прием свойства.

Светилен:

Подобен: Посетил ны есть:

Сказа нам Божественная чудодейя, славный Христова Евангелия писатель, * Матфей Богоприятный, * егоже, любовию чутце, благосочетанно воспоим.

Слава, ин:

Мытарства иго отверг разумно, * Христу последовал еси, о Матфее Богомудре! * Следом же Того чудно следуя, * в причастии был еси Того Царствия * и славы общник, и таинник неизреченных.

И ныне, Богородичен:

Всесвятяя руки Твоя, Богородице Дево, * имиже Зиждителя носила еси, * поднеси в молитву о нас к Нему, * яко да избавит ны всяких искушений диавольских * и получити будущих оных благ сподобит, Всепетая.

На хвалитех стихиры на 4, глас 4.

Подобен: Дал еси знамение:

Просиял еси, апостоле, * световиден, якоже солнце, лучами Духа, * и всю озарил еси вселенную, блаженне, Богознанием, * и отгнал еси мгу многобожия, Матфее всемудре. * Темже твое пресветлое и досточудное днесь совершаем торжество, * яко источник священния. [Дважды.]

На высоте седя Богознания, апостоле, * приял еси Духа зарю, * явившуюся тебе в виде и языке огненнем, * всю попалил еси яве нечестия вещь многобожную. * Тем тя, яко апостола и Богоглагольника, почитаем, * святое твое днесь совершающе торжество.

Возгремел еси, всемудре, вселенней * учения священная и спасительная, * и всю тварь от идолонействовства очистил еси, Матфее, * и просветил еси люди Евангелия светлостьюми; * идольская же капица разрушив благодатию, * Церкви же в славу Божию создал еси.

Глас 8:

Восплещем в песнях днесь, вернии, * в памяти честнаго апостола и Евангелиста Матфея, * той бо поверг иго златомытарства, и последова Христу, * и проповедник Евангелию Божественный бысть, * темже изыде пророчески вещание его во вселенную, * и молит спастися душам нашим.

Слава, глас 2. Византиево:

Иго оставив неправды * и злато отверг лихоимства, * игу правды притекл еси * и неистошное богатство хищаещи, * яко умоимуций купец, * възбизменив привременная на вечная * и погибающая на пребывающая, * Богосиянный бо и многоценный бисер стяжав, * кесарева кесарю, долу влекущая разумно оставил еси; * и Всецарю удобопокорне последовав Христу, * всю тварь обогатил еси

Евангельскими Богоглаголаньми, мудре. * Но испроси и ныне, Матфее преизряднейше, * тя чтущим спасение и велию милость.

И ныне, Богородичен:

Спаси от бед рабы Твоя, Богородице Дево, * яко вси по Бозе к Тебе прибегаем, * яко к нерушимей стене и предстательству.

Таже славословие великое и отпуст.

НА ЛИТУРГИИ

Блаженны апостола от канона, песни 3-я и 6-я.

Твоя апостолы, Слове Божий, светильники показал еси жизни, мрак отгоняющия безбожия, Владыко, и Божественною Твоею славою мир весь просвещающия.

Твоим вооружив всеоружием Матфея храбрейшаго, Спасе, мучителей крепчайша сего содеял еси, Владыко, и потребителя показал еси идольския лести, Человеколюбче.

Языка твоего огненнаго вещание демонская пожже капища, Матфее Богодохновенне, Параклитов органе, чрез Егоже Христос проповедается, всех Жизнь Ипостасная.

Евангелист от мытарства яко последова Тебе, претворися Богоглаголивый всеильною Твоею, Вседетелю, крепостию, Матфее всеизряднейший.

Управляется твоего благовестия душепитательными словесы языков множество, возвышаемо к добродетелей высокому верху, о Матфее всеблаженне.

Слава: **М**атфея уловляются Богоплетенными ученика мрежами соборы верующих всегда, к Твоему познанию, Благодетелю, наставляеми.

И ныне: Богородичен: Деву рождшую восписуя, благовествует Тя, всяческая Сотворшаго, без семени и тли, Всенепорочная, Матфее всеизряднейший.

Тропарь апостола, глас 3:

Усердно от мытницы к звавшему Владыце Христу, * явльшуся на земли человеком за благодать, * Тому последовав, апостол избранный явился еси * и блавестник Евангелия вселенней велегласен. * Сего ради чтим честную память твою, Матфее Богоглаголиве, * моли милостиваго Бога * да грехов оставление подаст душам нашим.

Кондак апостола, глас 4.

Мытарства иго отверг, * правды игу притяглся еси * и явился еси купец всеизряднейший, * богатство принес юже с высоты премудрость. * Отонудуже проповедал еси истины слово * и унылых воздвигл еси души, * написав час судный.

Прокимен, глас 4: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Апостол к Коринфяном, зачало 131.

Братие, Бог ны посланники последняя яви, яко насмертники, зане позор быхом миру и Ангелом и человеком. Мы убо буи Христа ради, вы же мудри о Христе, мы немощни, вы же крепцы, вы славни, мы же безчестни. До нынешняго часа и алчем, и жаждем, и наготуем, и страждем, и скитаемся, и труждаемся, делаяще своими руками. Укоряеми, благословляем, гоними, терпим, хулими, утешаемся, якоже отреби миру быхом, всем поправление доселе. Не срамляя вас сия пишу, но якоже чада моя возлюбленная наказую. Аще бо и многи пестуны имате о Христе, но не многи отцы,

о Христе бо Иисусе благовествованием аз вы родих. Молю же вас: подобни мне бывайте, якоже аз Христу.

Аллилуия, глас 1: Исповедят Небеса чудеса Твоя, Господи.

Евангелие от Матфея, зачало 30.

Во время оно, преходя Иисус, виде человека сидяща на мытнице, Матфея глаголема, и глагола ему: по Мне гряди. И востав по Нем иде. И бысть Ему возлежащу в дому, и се, мнози мытари и грешницы пришедше возлежаху со Иисусом и со ученики Его. И видевше фарисее, глаголаху учеником Его: почто с мытари и грешники Учитель ваш яст и пиет? Иисус же слышав рече им: не требуют здравии врача, но болящии. Шедше же научитесь, что есть: милости хошу, а не жертвы? Не приидох бо призвати праведники, но грешники на покаяние.

Причастен: Во всю землю изыде вещание их * и в концы вселенныя глаголы их.